

Hmong - Vaajtswv Ntawv - Soldiers Scriptures

Efexau 6:10-18

10 Thaus kawg nuav kuv qha mej has tas, mej yuav tsum nrug Vaajtswv sws raug zoo mej txha le muaj zug, hab tau nwg tug fwjchim kws luj kawg nkaus. 11 Mej yuav tsum muab tej cuab yeej kws Vaajtswv pub tsua mej lawm huvsw lug naav. Yog mej ua le ntawm, thaus Daab Ntxwg Nyoog tuaj ntxag mej, mej txha le kov yeej. 12 Tsua qhov tsw yog peb tawm tsaam tuabneeg, kuas yog peb tawm tsaam tej daab kws nyob sau nruab ntug, tsw has cov thawj los yog, tej kws muaj fwjchim los yog, tej fwjchim kws kaav tam tsaus ntuj nuav los yog, peb tawm tsaam huvsw. 13 Yog le ntawm, nwg nuav mej yuav tsum muab Vaajtswv tej cuab yeej lug naav. Yog mej ua le ntawm, thaus Daab Ntxwg Nyoog tuaj tawm tsaam mej, mej txha kov yeej. Hab thaus tej kev tawm tsaam ntawm dhau lawm, mej txha nyob tau ruaj nreeg. 14 Yog le ntawm mej yuav tsum npaaj tog. Ca le muab txujlug tseeb lug ua hlaab sa, muab kev ncaaj nceeg lug ua daim hlau thaiv hauv sab. 15 Hab mej yuav tsum muab lub sab kub quas lug kws moog qha txuj xuv zoo kws has tas, Vaajtswv tub qheb kev tsua tuabneeg moog cuag Vaajtswv lawm, lug ua khau rau. 16 Mej yuav tsum naj nub tuav kev ntseeg thaiv mej ib yaam le mej tuav daim hlau thaiv. Yog mej ua le hov mej yuav tua tau Daab Ntxwg Nyoog raab xub suav tawg kws nwg tua tuaj. 17 Ca le muab txujkev dim txem kws Vaajtswv pub tsua mej lawm coj lug ua mom hlau ntoo. Hab muab Vaajtswv txujlug kws Vaajtswv tug Ntsuj Plig pub tsua mej, coj lug ua ntaaj tuav. 18 Ib puas tsaav yaam kws mej ua nuav, mej yuav tsum thov Vaajtswv paab hab. Mej yuav tsum thov Vaajtswv txhua lub swmhawm lawv le kws Vaajtswv tug Ntsuj Plig coj mej. Vem le ntawm mej yuav tsum ua sab ntev thov Vaajtswv tsw xob nkeeg. Hab naj nub thov Vaajtswv paab cov ntseeg suav- dawg.

Ntawv Nkauj 91

1 Tug kws moog cawm sav tsua huv Yawmsaub hab nyob rawv huv Yawmsaub kws muaj fwjchim luj kawg nkaus lub xub ndag kws tiv thaiv khov quas kho, 2 mas txha has tau tsua Yawmsaub tas, koj yog tug kws tiv thaiv kuv hab yog kuv lub chaw cob cuab. Koj yog kuv tug Vaajtswv, kuv tso sab ntsoov tsua koj. 3 Nwg yuav tsw kheev koj maag luas txuj hlua cuab, hab yuav paab kuas koj dim tej sub sw. 4 Nwg yuav nthuav hlo nwg phob tis npug nkaus koj, nwg tsom kwm koj, koj txha le tso sab plhuav. Nwg txujkev

ncaaj nceeg yuav tiv thaiv tsom kwm koj ca. 5 Koj tsw xob ntshai tej kev ceb laaj hab kev puam tsuaj thaus mo ntuj, hab tsw xob ntshai tej xub nee ua rog kws nruab nub quas lug los luas ca le tua nthawv nthaav taamswm tuaj, 6 hab tsw xob ntshai tej mob phem kis sai kws muaj lug mo ntuj lossws tej sub sw kws raug ua lwj ua lam thaus nruab nub. 7 Txawm yog muaj ib txheeb leej tuabneeg qaug pes ntawg tuag ze rawv koj, hab muaj ib vaam leej tuag puag ncig koj los koj yuav tsw raug xwm le caag hlo le. 8 Koj yuav pum cov tuabneeg ua phem raug txem zoo le caag. 9 Koj muab Yawmsaub ua koj chaw cob cuab, hab muab Vaajtswv kws tseem ceeb dua ndais ua loog tiv thaiv koj, 10 mas yuav tsw muaj sub sw lug raug koj, kev nruj kev tswv yuav tsw lug ze koj vaaj koj tsev. 11 Vaajtswv yuav kuas nwg cov tubkhai sau ntuj tsom kwm koj, puab yuav tiv thaiv koj tsua txhua qhov kws koj moog. 12 Puab txhais teg yuav txhawb fwj koj ca, tsw kheev koj txhais kwtaw raug pob zeb. 13 Koj yuav tsuj pis ntag tsuv ntshuav hab naab, tej tsuv ntshuav kws nyaum hab tej naab muaj taug los koj yuav muab tsuj nkaus tsua huv koj xwb taw. 14 Vaajtswv has tas kuv paab cawm txhua tug kws muab sab npuab kuv kuas dim, hab yuav tsom kwm cov tuabneeg kws leeg kuv ua puab tug Yawmsaub. 15 Thaus puab tsaas suab hu kuv, kuv yuav teb puab. Thaus puab raug kev txom nyem kuv yuav nrug nraim puab nyob, kuv yuav cawm puab txujsa hab pub puab tau ntsej muag. 16 Kuv yuav pub puab muaj sa ntev ua neej nyob, hab kuv yuav paab cawm kuas puab dim.

2 Xamuyee 22

1 Zaaj nkauj kws yuav has nuav yog zaaj kws vaaj ntxwv Tavi hu ua Yawmsaub tsaug tsua thaus Yawmsaub cawm Tavi dim Xalu hab lwm tug yeeb ncuab txhais teg lawm. 2 Yawmsaub yog tug tsom kwm kuv, nwg yog lub loog ruaj ruaj kws thaiv kuv. 3 Kuv tug Vaajtswv yog tug kws tsom kwm kuv. Yog kuv nrug nraim nwg tes kuv nyob tsw muaj le caag. Nwg tsom kwm kuv zoo cuag le daim hlau tiv thaiv, nwg tuaj kuv tog paab kuv, paab kuv nyob kaaj nyob huv. Nwg yog kuv tug Cawmseej, nwg yog tug kws pov fwj pov yoom kuv hab cawm kuv txujsa. 4 Kuv hu Yawmsaub paab tes nwg txawm paab kuv dim ntawm kuv cov yeeb ncuab. Ua Yawmsaub tsaug. 5 Txujkev tuag ndaas quas ndua ib ncig ntawm kuv, txujkev puam tsuaj ndaas quas ndua tuaj nyaab kuv. 6 Kev tuag nyob ze ze ntawm kuv ib ncig, lub qhov ntshuav zoo nkaus le lub qhov taub kws tog quas rawv kuv poob tsua huv. 7 Kuv txom txom nyem kuv hu Yawmsaub, kuv thov kuv tug Vaajtswv

paab. Nwg nyob huv nwg lub tuam tsev nov kuv lub suab thov, nwg noog kuv tej lug thov. 8 Mas nplajteb txawm ua zug quas kais, tej neej ntug ua zug quas kais, vem yog Vaajtswv npau tawg. 9 Muaj paa nchu hlub hlub tawm huv Vaajtswv qhov ntswg lug, muaj ncaig tawg hab nplaim tawg tawm huv Vaajtswv qhov ncauj lug. 10 Vaajtswv dua lub ntuj es nwg nqeg lug. Thaus nwg nqeg lug nwg sawv sau ib tauv fuab tsaus quas nti lug. 11 Vaajtswv caij nwg lub tsheb sau ntuj yaa sai sai le, hab Vaajtswv caij cua yaa. 12 Vaajtswv muab qhov tsaus ntuj lug npug Vaajtswv, cov fuab kws muaj naag kws tsaus quas nti nyob ib ncig Vaajtswv. 13 Muaj tsag lig xub ua txaim lab quas vog ntawm Vaajtswv tug duab kws ci ci ua ntej moog. 14 Yawmsaub ua suab nrov yaam nkaus le xub quaj, tuabneeg nov Yawmsaub kws muaj fwjchim luj kawg nkaus lub suab. 15 Nwg xuas nwg cov xub nee tua ua yeeb ncuab tswv rw quas sua, hab tsag lig xub laim lab quas vog ua tsua puab tswv moog. 16 Thaus Yawmsaub npau tawg es nwg tshev hab nthe nwg cov yeeb ncuab tes tej dej huv hav txwv ca le txaws taag nrho mas pum taag nrho huv qaab thu hab pum cov neej kws txheem lub nplajteb. 17 Yawmsaub cev teg sau u tuaj ntsab nkaus kuv, es rhu hlo kuv tawm huv cov dej tub tub lug. 18 Yawmsaub paab kuv dim huv cov yeeb ncuab kws muaj zug hab cov kws ntxub kuv txhais teg. Kuv paab tsw tau kuv dim, vem puab muaj zug dua kuv. 19 Thaus kuv raug kev txom nyem puab kuj ntaus kuv, kuas Yawmsaub tsom kwm kuv. 20 Nwg paab kuv dim qhov kev txhawj xeeb, nwg zoo sab tsua kuv nwg txha paab kuv dim. 21 Kuv ua ncaaj ua nceeg mas Yawmsaub txha muab hov txhua chaw pub tsua kuv. Kuv tsw ua txhum mas Yawmsaub txha pub moov zoo tsua kuv. 22 Kuv ua lawv le Yawmsaub txuj kevcai, kuv tsw fee ntawm kuv tug Vaajtswv moog le. 23 Kuv koj lawv le Vaajtswv txuj kevcai txhua txuj huvsw, kuv tsw tseg ib lus le. 24 Vaajtswv paub tas kuv tsw muaj txem, hab paub tas kuv tswj kuv 1ub sab 1ub cev tsw kheev ua txhum. 25 Vem kuv ua zoo, tsw ua txhum, Vaajtswv txha pub hov txhua chaw tsua kuv. 26 Yawmsaub koj ua ncaaj tsua cov tuabneeg kws npuab koj, hab ua zoo tsua cov kws xyum zoo kawg nkaus. 27 Yawmsaub koj ua zoo tsua cov tuabneeg kws dawb huv, kuas koj ua tsw zoo tsua cov tuabneeg phem. 28 Koj cawm cov tuabneeg kws txu puab tug fwjchim, huas koj txu cov tuabneeg khaav theeb tug fwjchim. 29 Yawmsaub koj yog kuv lub teeb, koj ua tsua kuv txujkev tsaus ntuj kaaj quas lug lawm. 30 Koj txhawb kuv tug zug, kuv txha muaj zug ntaus yeeb ncuab hab muaj peev xwm tsoo tau yeeb ncuab tej ntsaa loog. 31 Vaajtswv ua daabtsw los nwg ua zoo kawg le. Peb tso sab tau tsua

Vaajtswv cov lug. Nwg zoo nkaus le daim hlau tiv thaiv tsua txhua tug kws tuaj vaam nwg tsom kwm. 32 Yawmsaub tuab leeg txha yog Vaajtswv. Vaajtswv tuab leeg txha le pov tau peb. 33 Vaajtswv yog kuv lub chaw nraim cev kws khov khov, hab nwg ua tsua txujkev kws kuv moog tsw ntshai daabtsw le. 34 Thaus kws nee roob Vaajtswv ua tsua kuv kwtaw tsuj tau ntsa quas nkaus yaam le muas lwj mas kuv txha tsw muaj le caag. 35 Vaajtswv muab kuv cob xyum ua rog, mas kuv txha txawj tua tau raab neev nti kws muaj zug hab tawv tawv. 36 Yawmsaub koj tsom kwm kuv hab paab kuv dim, qhov kws koj paab kuv mas tub ua tsua kuv luj tuaj. 37 Koj paab mas kuv txha tsw raug luas nteg hab tsw qaug tsua ntawm luas. 38 Kuv lawv cuag yeeb ncuab mas kov yeej puab hab tsw tso puab tseg moog txug thaus muab puab ua puam tsuaj. 39 Kuv ntaus puab qaug puab sawv tsw taug. Cov yeeb ncuab pw nrum quas saas ntawm kuv xub ndag. 40 Yawmsaub koj txhawb kuv tug zug kuv txha muaj zug ua rog, hab koj paab kuv kov yeej yeeb ncuab. 41 Koj lawv yeeb ncuab tswv ntawm kuv xub ndag moog, kuv ua tsua txhua tug kws ntsub kuv puam tsuaj. 42 Puab moog nrhav kev paab, kuas tsw muaj leejtwg paab puab, puab thov Yawmsaub, kuas Yawmsaub tsw teb puab. 43 Kuv muab puab tsoo mog quas nyoos le moov aav, hab muab puab tsuj yaam le tsuj tej aav huv txujkev. 44 Koj paab kuv dim ntawm koj haiv tuabneeg kws pheej faav xeeb, hab koj paab kuv kaav tau ob peb lub tebchaws tsw muaj chaw poob le, hab lwm yaam tuabneeg kws kuv tsw tau paub dua le los kuj tuaj zwm kuv. 45 Thaus lwm yaam tuabneeg pum kuv puab kuj hawm kuv, hab thaus kuv qha los puab kuj noog lug. 46 Puab tsw muaj zug tiv, puab txha tawm ua tshee quas nyo huv puab lub loog tuaj zwm kuv. 47 Yawmsaub muaj txujsa nyob, nwg tsom kwm kuv. Mej ca le ua nwg tsaug hab qhuas nwg, ca mej paab kuv tshaaj tug Vaajtswv kws paab kuv dim lub moo nrov nchaa moog. 48 Nwg paab kuv ntaus yeej yeeb ncuab, nwg paab kuv kaav tau cov tuabneeg kws zwm tsua kuv zoo zoo le. 49 Nwg paab kuv dim ntawm cov chawj chim. Yawmsaub koj paab kuv kov yeej yeeb ncuab, hab paab kuv dim ntawm cov tuabneeg kws txuv kuv. 50 Vem le nuav kuv txha qhuas koj tsua txhua yaam tuabneeg, hab hu nkauj qhuas koj. 51 Vaajtswv paab tug vaaj ntxwv kws nwg tsaav kov yeej, hab nwg hlab tug kws nwg xaiv tsw tu moog le, yog hlab Tavi hab Tavi caaj ceg ib txhws moog le.

Pastor T. John Franklin
Church of Salvation, Healing, and Deliverance
COS-HAD.org